



Inatsisartunut ilaasortaq,  
Mariane Paviasen, Inuit Ataqatigiit.  
Maani/

**§ 37 naapertorlugu apeqquummut nr. 226\_2022-imut uumasunut nakorsaqrneq pillugu apeqquummut akissuteqaat**

Ulloq: 02-01-2023  
Suliap normua: 2022 - 25578  
All. nr. 22064832  
Postboks 269  
3900 Nuuk  
Oqarasuaat (+299) 34 50 00  
Fax (+299) 34 63 55  
E-maili: apn@nanoq.gl  
www.naalakkersuisut.gl

Inatsisartut suleriaasianni § 37, imm. 1 naapertorlugu Tunumi aalisarneq pillugu Naalakkersuisunut apeqquteqarsimavutit. Apeqqut suliassaqrfigisannit akineqartus-sangorlugu innersuunneqarpoq.

1. Kujataani uumasut nakorsaannik atorfinitsisoqarpa?
  - a. Taamaanngippat, suna pissutigalugu suli atorfinitsisoqanngila?
  - b. Qanga kingullermik uumasut nakorsaannik atorfeqartitsisoqarpa?
  - c. Naalakkersuisut Kujataani uumasut nakorsaannik ataavartumik atorfinitsinissaanut pilersaaruteqarpat?
  - d. Taamaappat Naalakkersuisut pilersaarummik nassuiaanissaat kissaatigaara.

**1-mut akissut:** Nunatta kujataani uumasut nakorsaannik atorfeqartoqanngilaq.

- a. Nunatta kujataani uumasut nakorsaannik atorfinitsisimannnginnermut tunnga-viuvoq sumiiffimmi uumasut nakorsaannik atorfinitsisinissaq periarfissaqarsi-mannngimmat, naak atorfik arlaleriarlugu inuttassarsiuunneqartaraluartoq. Nalinginnaasumik nunarsuaq tamakkerlugu uumasut nakorsaat amigaataapput aammalu suliffinni atugassarititat, suliffiup angerlarsimaffiullu oqimaaqati-giissuunissaanik kiisalu suleqatigiittut isumasioqatigiittarnissamik suleqatigiilluar-nissamillu ukkatarinninninnerit annertusiartortillugit siunissami uumasut nakorsaannik ilinniarsimasunik naleqquttumik sumiiffinni atorfinitsisinarneq ajornakusuussalluni.
- b. Uumasut nakorsaat nunatta kujataani atorfeqartoq kingulleq sivikitsumik atorfeqareerluni 2022-mi junip naanerani atorfimminit tunuarpoq.
- c. Uumasut nakorsaannik atorfinitsisinissaq ajornartorujussuuvoq naak atorfik arlaleriarlugu saqqummiunneqartaraluartoq aammalu apeqqut a-mut akissutitit taarsiullugu qitiusumik uumasut nakorsaqrfiata Nuummut inissinneqarnissaa sulissutigineqaraluartoq tassanngaanniillu avannamut kujammullu ukiumi piffissap ilaatigut pisariaqartitsineq naapertorlugu angalasarnissaq sulissutigineqaraluartoq, peqatigisaanillu piffissami sivikinnerusumi taartaasartussanik sulisussarsiortarnissaq sulissutigineqarluni, assersuutigalugu savat piaqqiornerisa aammalu savaaqanik toqoraanerup nalaanni.
- d. Apeqqut c-mut akissut innersuussutigivara.

2. Kujataani uumasut nakorsaat qassit atorfeqarsinnaanerak akuersissutaava?

- a. Uumasut assigiingitsut qanoq amerlatigisut kujataaniippat?
- b. Uumasullu suut kujataani uumasuutigineqarpat?

**2-mut akissut:** Nunatta kujataani uumasut nakorsaannik ataatsimik atorfeqartitsisarneq nalinginnaasuumavoq.

- a. Uumasut, nunatta kujataani uumasut nakorsaata suliaanut pingaarnertut ilaasut tamakkiisumik isigalugit nunaateqarnermut uumasuutigineqarnermullu tunngassuteqarnerupput uumasullu pineqartut tassaallutik, savat, nersutit, hiistit, savat qimmii, nersutaasivinni qitsuit aamma kukkukuut amerlanngitsut kiisalu angerlarsimaffimmi uumasuutit tassaasut qimmit qitsuillu. Tamatumunnga atatillugu oqaatigineqassaaq angerlarsimaffimmi uumasuutit uumasut nakorsaata nalinginnaasumik suliaanut ilaangimmata uumasulli nakorsaanit sunngiffimmini isumagineqartarnikuullutik. Tassa imaappoq uumasut nakorsaanerata pisortani sulinermi saniatigut nammineerluni namminersortutullu uumasut nakorsaatut suliassat isumagisarnikuusimavai.
- b. Apeqput a-mut akissut innersuussutigivara.

3. Nunatta qeqqani uumasut nakorsaat qanoq amerlatigisut atorfeqarnissaat akuersissutaava?

- a. Nunatta qeqqani uumasut assigiingitsut qanoq amerlatigippat?
- b. Nunatta qeqqani uumasut suut uumasuutigineqarpat?

**3-mut akissut:** Nunatta qeqqani uumasut nakorsaat Nuummi Uumasunut Nakorsaarfik Inuussutissalerinermullu Oqartussaaffiup (UNIO'p) qitiusumik allaffeqarfianiipput. Piffissaq tamakkerlugu sulisussatut uumasut nakorsaannut sisamanut inuttassaqartitsisoqarpoq. Ilanngullugulu UNIO piffissami matumani marlunnik ullup ilaannaa sulisartunik atorfeqartitsivoq, taakkua UNIO-mi sulinermik saniatigut Donnas Dyreklinikimi nakorsiatitsinermik suliaqartarlutik. Taakku UNIO-mi nalinginnaasumik sulisunut ilaanngillat. Tamatuma saniatigut piffissami matumani inunnik marlunnik atorfeqartitsisoqarpoq inuussutissalerinermi eqqiluisaarnermullu ilinniagaqarsimallutik suliaqartunik.

Nunatta qeqqani uumasut nakorsaat uumasunik sullissinermik saniatigut allanik suliassaqartarput, ilaatigut inuussutissalerinermik nakkutilliinernik, Naalakkersuisut sinnerlugit sullissinernik kiisalu inuttaasunik sullissinernik, killeqarfinni nakkutilliinernik inatsisinik il.il suliaqartarlutik, tamatumalu saniatigut suliassat avannaanut kujataanullu tunngasut suliarsarlugit. Taamaattumik uummasut nakorsat ataasiakkaat suliassat nunatsinni sumiinngaanneerneq aallaavigalugu aalajangersarneqarnejq ajorput.

- a. Nunatta qeqqani kujataanisulli uumasuuteqartoqarpoq, (savat, hiistit, savat qimmii) kiisalu angerlarsimaffimmi uumasuutit, (pingaarnertut qimmit, qitsuit aamma uumasut mikinerusut). Tamatuma saniatigut aamma nunatta qeqqaniit nunap ilaa qimuttunik qimmeqarfiusoq suliffigisarpaa, tamannalu ima isumaqarpoq, uumasut nakorsaasa suliassaannut ilaapput qimmit qimuttut.
- b. Apeqput a-mi akissutinnut innersuussissaanga.

4. Avannaani uumasut nakorsaat qanoq amerlatigisut atorfeqarnissaat akuersissutaava?

- a. Avannaani uumasut assigiinngitsut qanoq amerlatigippat
- b. Avannaani uumasut suut uumasuutigineqarpat?

**4-mut akissut:** Oqaluttuarisaaneq isigalugu uumasut nakorsaat ataaseq marlulluunniit nunatta avannaani atorfeqartinneqartarput Ilulissani inissisimasarlutik.

- a. Nunatta avannaani uumasut nakorsaata pingaarnertut suliaarat qimmit qimuttut. Tamatuma saniatigut amerlanngitsunik uumasunik illumiutanik peqarpoq, tassa qitsuit uumasullu allat mikinerusut. Soorlu Nunatta kujataani angerlarsimaffinni uumasuutit uumasut nakorsaata atorfeqartinneqarneranut ilaanngillat, kisiannili uumasut nakorsaata namminersortutut suliarisarsinnaallugit.
- b. Apeqqut a-mut akissutinnut innersuussissaanga.

5. Neqi A/S-imi uumasunik toqoraaneq aallartikkaangat naliginnaasumik uumasut nakorsaat qanoq amerlatigisut ukiuni kingullerni marlunni atorneqartarpat?

- c. Ukiuni kingullerni marlunni uumasut nakorsaatut atorfeqartut sumit aggerfeqarpat?
- d. Ukiuni kingullerni marlunni uumasut nakorsaatut sulisut qanoq aningaarsatuutigineqarsimappat?
- e. Naatsorsorneqarnikuua uumasut nakorsaat marluk ataavaartumik kujataanni najugaqavissut pigineqaraluarpata aappaa Narsami, aappaa Qaqortumi qanoq akeqassagaluarnerisq?
- f. Naatsorsorneqarsimappat ataavartumik marlunnik uumasut nakorsaqaritsineq qanoq akeqassava?

**5-imut akissut:** Toqoraanermi aamma neqinik nakkutilliinermi suleriutsit pitsaasumik ingerlanneqarnissaat tunngavigalugu, toqoraanerup nalaani uumasut nakorsaat marluk pingasulluunniit sulisinneqarnissaat pilersaarusionerqartarpoq.

- a. Ukiuni kingullerni marlunni uumasut nakorsaat UNIO-mi aalajangersimasunik atorfilinnik aamma uumasut nakorsaannik Danmarkimeersunik siunertamut attartorneqarsimasunik inuttaqartarput.
- b. Uumasut Nakorsaasa sulinerannut aningaasartuutit eqqarsaatigalugit uumasut nakorsaasa neqinik nakkutilliinerat pineqarnerisq imaluunniit avataaniit suliarortunut aningaasartuutit pillugit apeqqutaanersq nalorninarpoq. Neqi A/S-imi ukiuni kingullerni marlunni toqoraanermik nakkutilliisussatut avataaniit tikisitanut aningaasartuutit ataatsimoortut 2021-mi 200.269,79 DKK-iusimapput 2022-milu 311.429,32 DKK-iusimallutik. Aningaasartuutit taakkua pisortanit akilerneqartarput, taakkununga ilaallutik aningaasarsiat, angallannermut ullormusianullu aningaasartuutit.
- c. Aalajangersimasumik uumasut nakorsaannik Narsami aamma Qaqortumi inissisimasussanik atorfeqartitsinermi aningaasartuutaasussat naatsorsorneqarsimanngillat.
- d. Apeqqut c-mut innersuussissaanga.

6. Uumaasut Nakorsaanik ataavartumik inuttaliisinnaannginneq sumit tunngaveqarpa?

**6-imut akissut:** Naatsorsuutigaara nunatta kujataani aalajangersimasumik uumasut nakorsaqaarneq pineqartoq. Apeqqummut 1-imut akissutinnut innersuussissaanga.

7. Ukiut tamaviisa toqoraalernerme tikisitsisarneq imaluunniit ukioq kaajallallugu Namminersorlutik oqartussat piffimmi atorfeqartitsippata aningaasatigut akilersinnaanerua?

**7-imut akissut:** Nunatta kujataani aalajangersimasumik massakkutut uumasut nakorsaqaannginnerani toqoraanermi nakkutilliisarnerit ilanngullugit uumasut nakorsaqaartitsinermut aningaasartuutit piviusumik naatsorsorneqarsimanngillat. Tamatumunnga atatillugu oqaatigineqassaaq neqinik nakkutilliisarneq aalajangersimasumik sulisut kisiisa atorlugit tamakkiisumik ingerlanneqarsinnaasarsimanngimmat. Toqoraanermut atatillugu ukiuni kingullerni amerlasuuni nunanit allaniit sulissussanik pissarsiniartarnissaq pisariaqartarsimavoq.

Inussiarnersumik inuulluaqqusillunga



Karl Tobiassen

Aalisarnermut Piniarnermullu Naalakkersuisoq